

Powšitkowne WOZJEWJENJA

njedźelu, 6. decembra 2020

Wusyłanje Božeje mšě live

Serbskorěčnu Božu mšu móža wěriwi tutu njedźelu, 6. decembra, znowa jako live-stream w interneće scěhować. Dopoldnja w 9 hodź. přenjese so wona z Chróšćanskeje cyrkwy. Link na nju je na internetowej stronje www.posol.de podaty.

Interaktiwna adwentnička

Serbscy młodostni a zajimcy su druhu adwentnu njedźelu, 6. decembra, w 14 hodź. na přeni serbski interaktiwny adwentny nyšpor do klóšterskeje cyrkwy w Pančicach-Kukowje přeprošeni. Na njón měli sej swoje šmóratko (smartfone) a Wosadnik sobu přinjesć.

Přiležnosć k swjatej spowědži w Róžeńće

sobotu, 12. decembra 17.00 – 18.00 hodź.	farar Michał Anders w kapali farar Beno Jakubaš na chórze farar dr. Michael Kleiner we wěži
wutoru, 15. decembra 18.30 – 19.30 hodź.	farar Michał Anders w kapali farar Tomaš Dawidowski na chórze farar dr. Bernhard Dittrich we wěži
sobotu, 19. decembra 17.00 – 18.00 hodź.	farar Michał Anders w kapali farar Tomaš Dawidowski na chórze farar dr. Bernhard Dittrich we wěži
wutoru, 22. decembra 18.30 – 19.30 hodź.	farar Michał Anders w kapali farar Šćěpan Delan na chórze farar Gerat Wornar we wěži

Přeco sobotu je do Božeje mšě za lud a kraj, kotraž so we 8 hodź. zahaji, přiležnosć k swjatej spowědži. Sobotu, 2. kaž tež 9. januara, pak wona w 17 hodź. njebudže.

Kemše w Róžeńće

Na swjedženju Marije bjezhřešneho podjeća, wutoru, 8. decembra, budu w Róžeńće kemše w 9 hodź. Wšitcy su na nje přeprošeni.

Różowc w Róžeńće

Na modlenje swjateho różowca w serbskej a němskej rěči sobotu, 12. decembra, w 17 hodź. su wěriwi do Róžeńčanskeje swjatnicy přeprošeni. Po tym je wustajenje Najswjećišeho. Za čas modlenja różowca budže składnosć k swjatej spowědži.

Turněr njebudže

Koparski halowy turněr wo pokal Towarstwa Cyrila a Metoda z.t. so spočatk noweho lěta koronoweje pandemije dla njewotměje. Po tym zo wojowachu mustwa w léće 2000 přeni raz wo tutón pokal a potom stajnje w zymje, so wón tónkróc přeni raz scyła njewotměje.

TCM podpěra dušepastyrski projekt fararja dr. Dzikiewicza

Dary za Pólsku hromadža so hakle klětu

Towarstwo Cyrila a Metoda z.t. (TCM) chce ze swojej akciju „Łužica pomha“ tónkróc projekt fararja dr. Daniela Dzikiewicza, kotryž je dobre džewjeć lět w Chróscicach skutkował, finacielnje při twarje wosadnicy we Wojdatach podpěrać. Tu trjeba wón, zo by w swojej wosadze z mnohimi młodymi swójbami – lětsa mějachu 80 přenjowoprawjenskich džěci a runje telko křćeńcow – porjadnje pastoralnje skutkować móhł. Wobšěrnje je projekt w Katolskim Posole z 25. oktobra wopisany. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Litawska“ přepokazać. Štóz sej darowansku kwitowanku přeje, měł swoju dospołnu adresu zdžělić.

Předsyda TCM Jurij Špitank skedźbnja na to, zo towarstwo w akciji „Łužica pomha“ koronoweje krizy dla lětsa nazymu za Pólsku dary njehromadži, kaž je wone to zašle lěta činiło. Dalokož móžno, ma so to klětu nalěto nachwatać.

Nowa plaćizna za Katolski Posoł

Po wosom lětach so plaćizna za Katolski Posoł wob lěto wo dwaj euraj zwyżi. Wot 2021 wučinja lětny abonement 27 eurow, z póstom 54 eurow.

Adwentny nyšpor w swójbje swječić

Worklečanske džěćace dekanatne dušepastyrstwo je za kóždu adwentnu njedzelu nyšpor spřihotowało, kotryž móže so w swójbje swječić. Namjet wotběha budže aktualnje na internetowej stronje www.posol.de wozjewjeny.

Smochčanski forum wirtuelnje: Hody – mjez nakupowanskim wopojenjom a powšitkowym derjeměćom

Smochčanske kubłanišćo swjateho Bena přeprašuje wšitkich zajimcow k digitalnemu Smochčanskemu forumej, kotryž wotměje so póndzelu, 7. decembra, wot 19.30 do 21.00 hodž. k temje „Hody – mjez nakupowanskim wopojenjom a powšitkowym derjeměćom“. Referentka je socialna wědomostnica Bea Hackbarth. Wona chce so z wobdžělnikami mjez druhim wo tym rozmołwjeć, kak móhło so dobre žiwjenje wšitkim radzić. Zajimcy měli so pola Christiny Weber w Smochćicach pod umwelt@kebs.de přizjewić, zwotkelž daty k onlinowemu přistupej dóstanu.

Rozšěrja wotewrjenske časy

Hladajo na to, zo w klóštrje Marijinej hwězdze adwentne wiki koronoweje pandemije dla njebudu, rozšěrja w tamnišim klóšterskim wobchodze wotewrjenske časy. Na wšitkich štyrjoch sobotach do adwentnych njedzelow wjesela so tam wot 10.00 do 16 hodž. na hosći. Sobotu, 12. decembra, předawaja na klóšterskim dworje zdobom božodžěscowe štomy.

Onlinowy forum: Kotry wliw ma korona na Bože služby?

Na přichodnym zarjadownju wuchodoněmskich cyrkwinskih wikow „die pastore!“ móža so wšitcy zajimcy online wobdžěleć. W rozmołwje wutoru, 15. decembra, wot 18 do 19.30 hodž. wěnuja so prašenju, kotry wliw ma korona na Bože služby. Při tym póndže mjez druhim wo pro a contra přenošowanja Božich službow w interneće. Link k přiwjenjenju je pod www.posol.de podaty.

W Hejnicach trjebaja pomoc

Na zakładze wuscutkow tuchwilneje koronoweje pandemije je situacija w klóštrje w čěskich Hejnicach jara napjata, wšako njejsu tam žanežkuli zarjadowanja móžne. Podobnje Smochčanskemu kubłanišću swjateho Bena wužiwa so klóšter jako kubłanski a putniski centrum a leži na kromje Jizerskich hór. W Čěskej pak njedóstawaju tajke kubłanske domy kaž w Němskej statnu a cyrkwinsku podpěru.

Pod třěchu Ekumeniskeho tachantskeho wobchoda z.t. (Ökumenischer Domladen Bautzen e.V.) eksistuje nětko Kruh přečelow a podpěračelow Hejničanskeho klóštra. Štóž chce čěski kubłanski dom rady podpěrać, móže swój dar na towarstwowe konto tachantskeho wobchoda pola Ludoweje banki Drježdźany-Budyšin pod hesłom Kloster Haindorf přepokazać: IBAN DE33 8509 0000 5626 2110 05. Darowanske kwitowanki towarstwo wustaja. Wšitke pjenježne dary přepoda wone direktnje do Hejnic.

Znaty a woblubowany je klóšter tež w Serbach. Hižo časćišo putnikowachu wěriwi z Łužicy do tamnišeje hnadowneje cyrkwyje. Mnohe lěta přewjedžechu w kubłanskim domje tež serbske chóry swoje probowe lěhwa, wosebje prawidłownje přebywaše tam chór Budyskeho Serbskeho gymnazija.